

12 AUG 2000

Singapura-Lawatan/I

LAWATAN LEE AKAN TINGKATKAN HUBUNGAN DUA HALA

Oleh: Harlina Samson

KUALA LUMPUR, 12 Ogos (Bernama) -- Negarawan Singapura Lee Kuan Yew akan menjejaki tanah Malaysia pada Isnin dengan menyandang kuasa yang hampir sama semasa menjadi perdana menteri sedekad yang lepas.

Lawatan ini merupakan lawatan kerja pertama Lee ke Malaysia sejak menyerahkan jawatan Perdana Menteri kepada Goh Chok Tong pada 1990 dan menyandang jawatan sebagai menteri kanan.

Sepanjang kunjungan empat hari itu Lee akan mengadakan perbincangan dengan beberapa pemimpin Malaysia, termasuk Perdana Menteri Datuk Seri Dr Mahathir Mohamad.

Para penganalisis politik melihat lawatan Lee itu sebagai langkah untuk meningkatkan hubungan yang adakalanya bergolak antara Malaysia-Singapura.

Hubungan dua hala tegang dalam beberapa tahun kebelakangan ini disebabkan beberapa "masalah" seperti penempatan Kompleks Kastam, Imigresen dan Kuarantin (CIQ) di Singapura serta rundingan perjanjian baru bekalan air ke Singapura.

Sebahagian daripada memoir Lee yang dikeluarkan pada 1998, mengenai sejarah Singapura menuju kemerdekaan dan ceritanya mengenai penyatuan singkat dengan Malaysia dari 1963 hingga 1965 turut mencetuskan kontroversi di Malaysia.

Para penganalisis berkata sikap tidak sensitif pihak media republik itu dalam liputan mereka mengenai hal ehwal dalaman Malaysia dan komen-komen terhadap para pemimpin Malaysia telah menegangkan lagi hubungan antara kedua-dua negara.

Lee akan datang ke Kuala Lumpur menggunakan jalan darat melalui Laluan Kedua antara Singapura dan Johor dan singgah di Resort A'Famosa Melaka.

Setibanya di Kuala Lumpur, pemimpin yang berusia 76 tahun itu akan menemui Menteri Kewangan Tun Daim Zainuddin, menurut aturcara lawatan yang dikeluarkan oleh Wisma Putra hari ini.

Pada Selasa, rombongan Lee, termasuk isterinya Kwa Geok Choo dan 10 pegawai akan melawat Menara Kembar Petronas.

Lee juga dijadual melawat Putrajaya dan kemudian mengunjungi Dr Mahathir serta Timbalan Perdana Menteri Datuk Seri Abdullah Ahmad Badawi.

Kali terakhir Lee dan Dr Mahathir bertemu ialah di Forum Ekonomi Dunia di Davos, Switzerland awal tahun lepas.

Lee dijadual membentangkan kertas kerja "East Asia's Status in the 21st Century" (Status Asia Timur pada Abad ke-21) pada forum di Institut Kajian Strategik dan Antarabangsa (ISIS) Rabu ini.

Pada Khamis, Lee akan bertemu Menteri Pertahanan Datuk Seri Najib Tun Razak dan melawat Lapangan terbang Antarabangsa KL di Sepang sebelum berlepas pulang.

-- BERNAMA

HS ES LAT RON